

陸

子

學

譜

陸子學譜卷之十四

陸川龐 嶼校

弟子九

邵中孚

邵中孚里居官階俱無考。師事先生甚篤。嘗以書自述所學。先生答書勉之云。承示進學證驗。此乃吾友天資朴茂。立志堅篤。故能如此。可喜可慶。居天下之廣居。立天下之正位。行天下之大道。乃吾分內事耳。若不親師友。汨沒於流俗。驅而納諸罟獲陷阱之中。而莫之知辟。豈不可憐哉。孟子曰。苟得其養。無物不長。苟失其養。無物不消。今吾友既得其本心矣。

總此能養之而無害則誰得而禦之如木有根苟有培浸而無傷戕則枝葉當日益暢茂如水有源苟有疏浚而無壅窒則波流當日益充積所謂源泉混混不舍晝夜盈科而後進放乎四海有本者如是何時相見諸當面盡未聞千萬勉旃以卒賢業

按先生答中孚此書尚有後一半已見第三卷

張行已

張行已官階里居亦無考或云即象山之山主也師事先生結屋於象山之上先生題其所居之堂曰明德見先生五十歲年譜

劉敬夫劉定夫

劉敬夫名思忠建昌南豐人淳熙八年進士仕至瑞州通判

與弟定夫並師事先生亦俱往問學於朱子先生五十歲年譜云南望劉敬夫學周禮見晦菴晦菴令其精細考索復見先生問見朱先生何得敬夫述所教先生曰不可作聰明亂舊章如鄭康成注書杓鑿最多讀經只如此讀去便自心解注不可盡信或是緯語或是莽制傳季魯保社中議此甚明可一往見之於是敬夫往問於季魯云定夫亦嘗與朱子論學不甚相合先生答朱子書云劉定夫氣稟倔强恣睢朋儕鮮比比來遁然方知自訟大抵學者病痛須得其實徒以臆想稱引先訓文致其罪斯人必不心服縱其不能辯白勢力不相當強勉誣服亦何益之有豈惟無益亦以害之則有之矣先生答胡無相書云定夫約早晚登山蓋定夫師事先生亦結屋於象山也性好爲詩積成卷軸先生甚許可之嘗題

其詩軸云、人生不更涉、何由知險艱、觀君一巨軸、奚啻百廬山、一日先生感歎時俗汨沒、未有能自達者、因歌定夫所爲象山詩云、三日觀山、山愈妍、錦囊收拾不勝編、萬山擾擾何爲者、惟有雲臺山巋然、

先生嘗有語云、事有難易、定夫初來、恐難說話、後來却聽得入、覺得顯道、昆仲說話難、

先生又說定夫舊習未易消、若一處消了、百處盡可消、顯道謂晦翁逐事爲他消不得、先生曰、不可將此相比、他是添、

張少石

張鎮字少石、建昌南城人、淳熙八年進士、十四年、從先生講學、結屋於象山之上、先生題其所居齋名曰珮玉、以其下澗水清琤可聽也、又題其所居小室曰封菴、

張伯強

張伯強里居官階無可考。或云亦象山山主行己之羣從也。淳熙十四年結屋於象山之上。從先生問學。象山精舍正廳事曰養正堂。左爲居仁齋。右爲由義齋。伯強讀書其中。又自爲退休之室。在林壑幽處。與行己同居。先生題其額曰儲雲。

周伯熊

周伯熊南城人。字伯熊。以字行。中紹熙元年庚戌科進士。先生年譜云。乾道八年先生成進士。七月至家。問道者日盛。周伯熊來學。先生問學何經。對曰。讀禮記。曾用功於九容乎。曰。未也。且用功於此。後往問學於晦菴。晦菴曰。仙里近陸先生。曾見之否。曰。亦嘗請教。其逆所言。晦菴曰。公來問某某亦不過如此說。

周平先

周平先，里居官階無考。止見先生五十歲年譜，蓋結屋於衆山之上而從學者也。先生題其所居曰志道云。

桂德輝昭然

桂昭然，字德輝，信州貴溪人。師事先生最蚤。乾道八年，先生既成進士，歸家需次。德輝即來從學。先生稱也。顯道書云：貴溪桂店一族甚盛，其子弟有德輝者。今夏來處茅屋云。按德輝後登慶元五年進士，其歷官所至未詳。桂店即今之鷹潭，距貴溪縣四十里。桂氏之族至今猶稱盛，衣冠文學相望不絕。

周元忠良

周良，字元忠，建昌南城人。嘉定七年進士，早從先生問學。所

至必侍行。嘗在臨安。與楊敬仲簡。胥必先訓。同侍先生遊西湖。元忠與必先奕棋。敬仲爲長句二章以紀其事。詩今見慈湖遺書。又與羅春伯點厚。善嘗應其招。暫辭函丈。以書來問學。言疑者滿腹。皆未得吐。先生答書云。元忠在此。雖稍久。殊覺未亨。通初以春伯處相喚。繼以許尉事。皆不得不應者。又相聚時。亦無汲汲如不及之意。雖云有不自安處。終未痛切疑而後釋也。而後解屯疑之極。必有汲汲皇皇不敢頃刻自安之意。乃能解釋。向來元忠心志。果誠故與言者必有感動。行檢嚴整。故與處者必有繩約。年來此功。寔不如舊。元忠本謂欲改其固滯介執之意。反損前日之善。而固滯介執之實則未之有改。但換易形模。元忠自不知耳。學之不進。明之不足。暗於大端。自是已見。而不開君子之大道。固其宜也。所喻

滿腹之疑。皆未得吐。若自是之意消。而而不自安之意長。則自能盡吐其疑。及屯亨疑釋。則所謂滿腹者。其實不多。但當其不明時。自膠固迷泥。故多事耳。相見不能決白。乃以紙筆達之。此亦自顛倒。然事又不可概論。或恐因此省悟。未可知也。元忠得書。旋歸就學。淳熙十四年。先生既得貴溪之應。天山精舍。改山名象山。授徒其間。四方聞風而至。嘗不下數百人。元忠亦結廬其上。先生嘗以事歸金谿。未至。元忠作書請先生登山。併請示期。先生答之云。積雨遐想。風練飛雪之壯。甚願與諸公緒經其間。以俟王芝之茂。倘有意於此。何以期爲。霽日媚景。晴雲絢文。此吾命駕時也。今日平分一春。羲和會少出幽陰。緩轡天衢。照臨吾徒。成此盛集云。

黃日新里居官階未詳。或云金谿人。先生與書云。與同舉送。則先生鄉舉同年也。先生無意應舉。紹興三十二年壬午歲。以李侍郎浩勸。駕始以周禮應試。舉第四人。十月丁母憂。未赴禮部試。又十年。至乾道七年辛卯歲。復以易經與鄉舉。明年成進士。日新與先生同舉。未知是壬午。抑係辛卯也。先生與書規勸甚至。必可與進道者。今附先生與日新書於後云。執別彌年。比復得一見。目足下之貌。耳足下之言。知足下之學。甚得其所以為名。欣喜踴躍。不以今日之同舉送。而以其同心志也。善惡邪正。君子小人之各以氣類相從。蓋如此。雖然。此有大可畏者。以夫子之聖。孟子之賢。猶不免叔孫臧倉之毀。僕與足下。蓋所謂志乎善與正而君子之徒者也。繩之以聖賢之事。固有不勝其任者。然聖賢之所與也。亦聖賢之

所責也。若志夫邪惡之小人，則固與我薰蕕矣。蓋憎主人，
吠希見僕與足下之所與殆。憎吠之招也。吁，可畏哉！彼
習俗蔽於聞見，以陷於惡而失其本心者，不可遽謂之小人。
聞善而慕，知過而懼，皆君子之徒也。若乃親善人，聞善言，見
善行，而狼狽自若，無所忌憚，慧黠姦慝，常有毀傷善類之心。
此所謂志夫邪惡之小人，而聖人所用發策之道，以說其極
樁者也。其甚者，亦獨能使之革面而已。喜憎吠者，蓋此流也。
天將降大任於是人，必先苦其心志，行拂亂其所為，所以動
心忍性，增益其所不能。足下其識之。僕之言將若左。契安其
身，而後動易其心；而後語定其交，而後求行有不得者，反求
諸其身。此僕之所聞所知，而未能者，願與足下共講而共由
之。

劉伯協恭弟伯文

劉恭字伯協建昌南城人紹熙元年庚戌科進士嘗仕爲浙江瑞安宰歷官階至中順大夫早從先生爲學淳熙十六年己酉歲侍先生遊翠雲寺寺在金谿雲林山蓋三十六峰最勝處也先生題寺壁紀同遊之勝言劉伯協戒子朝餐又云伯協誇翠雲泉石不減廬阜云先生嘗作書與江西帥及倉漕諸使極言郡邑官吏貪殘之害伯協以書規勸謂其人家世貴盛不必逢其怒且居是邦非其大夫恐於名分未安先生以書答之云人家之興替在義理不在富貴假令貴爲公相富等崇愷而人無義理正爲家替若簞食瓢飲肘見纓絕而人有義理正爲家興吾人爲身謀爲子孫謀爲親戚謀皆當如此然後爲忠其自謀者或不然亦是不忠於吾身矣某

向來區區之志。素有不。在利害間之語。正爲此耳。來示所謂輕犯名分之語。甚未當理。名分之說。自先儒尚未能窮究。某素欲著論以明之。流及近時。爲獎益甚。至有郡守貪黷庸繆。爲厲民之事。縣令以義理爭之。郡守輒以犯名分劾令。朝廷肉食者不能明辯其事。令竟以罪去。此何理也。理之所在。匹夫不可犯也。犯理之人。雖窮富極貴。世莫能難。當受春秋之誅矣。當此道不明不行之時。羣小席勢以從事。亦何嘗不假借道理以爲說。顧不知彼之所言道理者。皆非道理也。倘不以斯言爲罪。敢傾倒以畢其說。伯協得書。謂先生言固是。然道大何所不容。先生又答書云。某之說。正吾人大趨向。大旨歸所當先辨者。此之不辯。而規規然以聲音笑貌爲道。真放飯流歎而問無齒決。養其一指而失其肩背。孟子所謂不知。

務不知類也。

伯協爲瑞安軍時，與陳君舉、徐子宜、蔡行之等交好，嘗載酒遊趙氏園亭，與君舉叔靜道甫子宜行之同集。小雨新霽，君舉有詩云：「上已所餘春有幾，不堪春雨付春愁。君能載酒知誰似，我欲看花不自由。」倚岸小舟謀未定，隔林斜日故相投。莓苔踏遍篝燈去，收拾殘紅插滿頭。君舉又有奉陪王德修登觀湖閣，兼呈邑宰劉伯協詩云：「觀湖閣在東溪上，有客來登自華陽。不道雪山通老柏，却看朝日上扶桑。勝遊氣合南三郡，原注云：刊揚益也。劉江西人。妙畫家傳晉二王。後會不知誰與繼，爾江吾海永相望。」二詩今見止齋集中。

劉伯文名與官階俱未詳，或云伯協羣從兄弟，同學於先生者也。先生三十四歲年譜記朱濟道云：「到陸宅，先生所以誨

人者大概是令人求放心不復以言語文字為意陳正已別伯文皆不為文字云云然則伯文蓋從學於陸子之家者也

黃循中

李舜輔附

黃循中里居官階未詳或云臨川人即紹熙元年進士名若訥者也先生集有與循中書云某山居講習粗適素懷荆門之命固出廟朝不忘之意然雅未有為吏之興幸尚遇次可徐決去就耳人之不可以不學猶魚之不可以無水而世至視若贅疣豈不甚可歎哉官場間竊取富貴者何限惟庸人鄙夫羨之耳識者視之方深憐甚憫傷其賦人之形而不盡人之道至與蟻蟲同其飽適好惡虛生浪死其在高位者適足以播惡遺臭貽君子監戒而已此固循中所宜深曉第居今之世不得不申言之諒亦不厭於此也循中嘗與朱子門

人江德功論學述所論質之先生先生答書云江德功質本庸闇加以所學之繆豈復有可論者所惜吾友爲其所引辨於其不足辨也古書有明理之言有教人用工之言如中庸首章惟戒謹不睹恐懼不聞及謹其獨是用工處次章惟致中和是用工處他辭皆明理之言推此可類見與晦翁往復書錄往伯珍舜輔會次幸示之按舜輔姓李莫知其里居官階蓋先生門人多至數千人固不能盡傳也

陶贊仲

陶贊仲里居官階未詳或云南城人即慶元五年進士陶述或云嘉泰二年進士陶述堯也嘗從學於先生踐履篤實先生既之荆門贊仲聞晦翁因無極之辨與先生牴牾以書請問其故先生答書言太極圖說其學出於老氏并示以辨論

之由。贊仲因索先生三書。及晦翁來書。先生又以書答之。贊仲好象數之學。先生以爲非身心所急。故書中併及焉。今附先生答贊仲二書於後。

先生與贊仲第一書云。某承乏將十閱月。未有善狀。冬春久晴。種不入土。春季嘗一致禱於山川之神。其應如響。山溪漲溢。田畝充然。自是又無大雨。地土以積乾。易涸。今既踰月。又以旱告矣。勢甚可畏。昨日復致禱。詣之時。雨亦隨下。然竟不能成澤。今早復叩之。亦以疎雨見應。未蒙霈然之賜。幸醒睡未解。猶有可望。不然。定當投効以謝斯民也。太極圖說乃梭山兄辯其非。是大抵言無極。而太極是老氏之學。與周子通書不類。通書言太極不言無極。易大傳亦只言太極不言無極。若於太極之上加無極二字。乃是蔽於老氏之學。又其圖

說本見於朱子發附錄。朱子發明言。陳希夷太極圖傳在周
茂叔遂以傳二程則其來歷爲老氏之學明矣。周子通書與
二程言論絕不見無極二字。以此知三公蓋已皆知無極之
說爲非矣。梭山曾與晦翁面言。繼又以書言之。晦翁大不謂
然。某素是梭山之說。以梭山謂晦翁好勝。不肯與辯。某以爲
人之所見偶有未通處。其說固以己爲是。以他人爲非。且當
與之辯白。未可便以好勝絕之。遂尾其說以與晦翁辯白。有
兩書甚詳。曾見之否。以晦翁之高明。猶不能無蔽。道聽塗說
之人。亦何足與言此哉。仁義忠信樂善不倦。此夫婦之愚不
可與知能行聖賢之所以爲聖賢。亦不過充此而已。學
動起事當以此爲根本。若夫天文地理象數之精微。非有絕
識加以積學。未易言也。某欲作一標著說。稍發易數之大端。

以排異說。晚後學坐事奪。未克成就。早晚就章。當奉納一本。何時合并。以究此懷。德成而上。藝成而下。行成而先。事成而後。論語曰。入則孝。出則弟。謹而信。汎愛衆。而親仁。曰。言忠信。行篤敬。孟子曰。仁義禮智根於心。其生色也。晬然見於面。盎於背。施於四體。四體不言而喻。曰。仁義禮智樂善不倦。此等皆德行事。爲尊爲貴。爲上爲先。樂師辨乎聲詩。祝史辨乎宗廟之禮。與凡射御書數等事。皆落也。爲卑爲賤。爲下爲後。古人右能左賢。自有定序。夫子曰。君子多乎哉。不多也。曾子曰。遷豆之事。則有司存。凡所謂藝者。其發明開創。皆出於古之聖人。故曰。百工之事。皆聖人作也。然聖人初不尚此其能之也。每以教人。不以加人。若德行中庸。固無加人之理。世衰道微。德行淺薄。小人之有精力者。始以其藝加人。珍其事。秘其

說以增其價。真所謂市面故風俗日以不美。流傳之久。藝之
愈益不精。而眩駑之風。反更張大。學不辨本末。不知高下。未
有不爲此輩所眩者。吾觀近時談數學者。陋日益甚。妄日益
熾。未嘗涉其門戶。得其師傳。安能辨其是非。但以前尊卑貴
賤。上下先後之義推之。則自知所決擇。誦妄之情。大概亦可
見矣。作書畢。恐贊仲不能不惑於庸人庸夫之說。故復書此
以助決擇。

其第二書云。荆公祠堂記。與元晦三書併往。可精熟讀。此數
文皆明道之文。非止一時辯論之文也。元晦書偶無本在此。
要亦不必看。若看亦無理會處。吾文條析甚明。所舉晦翁書。
辭皆寫其全文。不增損一字。看晦翁書。但見糊塗沒理會。觀
吾書坦然明白。吾所明之理。乃天下之正理。實理。常理。公理。

所謂本諸身。證諸庶民。考諸三王而不謬。建諸天地而不悖。
質諸鬼神而無疑。百世以俟聖人而不惑者也。學者正要窮
此理。明此理。今之言窮理者。皆凡庸之人。不遇真實師友。妄
以異端邪說。更相欺誑。非獨欺人。誑人。亦自欺自誑。謂之謬
妄。謂之蒙闇。何理之明。何理之窮哉。贊仲爲人質實。學雖未
至。且守質朴。隨分檢省。雖未必盡是。却儘勝誑妄之人。餘見卷二

許昌朝

許昌朝名未詳。里居官階無可考。惟先生翠雲題壁。稱淳熙
己酉長至後二日寓許昌朝家。明日之遊昌朝與焉。按翠雲
寺在雲林山。昌朝家其地。則金谿人也。先生嘗云。許昌朝集
朱呂學規在金谿教學一冊。月令人一觀。固好。然亦未是某

平時未嘗立學規。但就本上理會有本自然有末。若全去末上理會。非惟無益。今既於本上有所知。可畧畧地順風吹火。隨時建立。但莫去起爐作竈。

按先生門人有許中應。又有許昌朝。並嘗爲教授。中應已見前。或云昌朝即臨川開禧元年進士名之選者。曾任南雄教授。時金谿多由臨川籍中式。如先生與文達公中進士。江西通志選舉表並注曰臨川人。蓋亦以臨川籍中式者也。

劉進士造

劉造字深父。建昌南城人。慶元二年進士。或云係天台。劉深父嘗爲候官尹。著杯水論。而真西山爲之題跋者。未知孰是。元生答所父書已節錄於第二卷讀書條下。其餘補錄於此。

云來書示以方冊所疑足見爲學不苟簡然其理皆甚明白
本無可疑若於此未能通曉則是進學工夫不甚純一未免
滯於言語爾今欲一一爲深父解釋又恐只成言語議論無
益於深父之身之心非徒無益未必不反害之也大抵爲學
但當孜孜進德修業使此心於日用間戕賊日少光潤日著
則聖賢垂訓渙然冰釋怡然理順有不加思而得之者矣若
固滯於言語之間欲以失已滯物之智強探而力索之非吾
之所敢知也某銓曹再黜來歲又未免一來深父勉之謹無
以言語議論妨進修之路使此心之良無斧斤之伐牛羊之
牧而有雨露之霑滋雷風之鼓舞日以暢茂條達則來示數
章不求解於他人矣

豐有俊字宅之慶元府人清敏公稷之裔從學於先生甚久先生有答宅之書云比年山居頗有泉石之趣朋友之樂恨不得與吾宅之共此承需鄙文乏筆吏不能多錄謾往數篇亦足以知山野况味又云使人到山間值持之疾作老夫亦苦頭痛登山未久應酬殊役役作復莫究所懷行營雜錄載宅之偶過酒樓見小娼類故人女詰之果然因白臨安尹王宣子佐共出資厚嫁之亦有得於躬行實踐者也

諸葛誠之

兄受之

諸葛誠之名千能浙江會稽人乾道八年先生成進士歸家道經富陽誠之與孫應時石應之等俱來從學焉

先生與誠之書云誠之嗜學甚篤又有筋力朋友間尤所賴者諷後曾與淳叟欵曲否既見其過義不宜嘿承論唯知頓

身於規矩準繩中而痛鋤狂妄之根。誠使心不狂妄而身中
規矩準繩不亦善乎。縱未能如此。但狂妄日減。日就規矩準
繩。日以純然。亦爲難得。以誠之之勤篤從事於規矩準繩中。
此亦其所長也。但不知所謂狂妄之根者。果何如。將何如。而
鋤之。不知下手鋤時。便鋤得去也。無若鋤得去。自後却遂無
此矣。爲復此根。非若草木之根。一鋤去後。便無。雖鋤得去。又
復生耶。爲復雖鋤之。而不能盡去之耶。又不知此狂妄之根。
與常人同。不與常人同。是素來有此。是後來起得。若後來起
得。却是因何而起。凡此皆當辯明。又誠之所愧惕者。爲復只
是狂妄未息。未中規矩準繩。而愧惕爲復。別有未足處。愧惕
爲復二者兼之。此一節亦須明白。古人不自滿假。克自抑畏。
戒謹不覩。恐懼不聞。戰戰兢兢。如臨深淵。如履薄冰。取善求

益如恐不及者。乃其踐履之常也。誠若此者。非如桎梏陷阱。然也。中庸言恐懼乎其所不聞。而大學言有所恐懼。則不覺其正。此其辨也。講學固無窮。然須頭項分明。方可講辨。若自交加糊塗。則須理會得。交加糊塗處。分明方可講辨。如楊朱墨翟老莊申韓。其道雖不正。其說自分明。若是自分明。雖不是。亦可商確理會。大抵講學有同道中鞭策切磨者。有違不同而相與辯明者。如孟子與楊墨告子辨。此是道不同而與之辯明者也。如舜禹益皋陶相與都兪吁咈。夫子與顏淵仲弓問子寮相與問答。是同道中發明浸灌鞭策切磨者也。如子夏子游之論門人小子。子張子夏之言交道。雖同師夫子。各有所得。亦是有所不同處。當時子夏子游子張各知其有不同。乃有商量處。縱未能會通。亦各自分明。若更要理會。盡不

糊塗承合并之期不遠且欲得誠之自理會頭項分明庶幾相見有可理會也。

先生答誠之第二書云。承喻學術更不費力。永無懈怠。自然常不離道。若至從心所欲。不喻矩之地矣。此理固無阻。顧恐公未有此力量。爾中人之質。戕賊之餘。以講磨之力。暫息斧斤。浸灌於聖賢之訓。本心非外。錯當時。豈不和平。安泰更無艱難。繼續之不善。防閑之不嚴。昏氣惡習。乘懈而熾。喪其本心。覺之而來復。豈得達無艱也。一意自勉。更無他疑。則屯自解矣。此頻復所以雖厲而無咎。仁者所以先難而後獲也。繼續之善。防閑之嚴。中人之質。亦恐未能免昏氣惡習之間作。然辨之於早。絕之於微。則易爲力耳。鄉見誠之未夜而睡。非有疾病。非委頓。不能支持。但氣昏體倦。欲睡而遂縱之耳。誠

之不能於此時少加勉強誅而勿縱而欲別求道術別起疑
惑不亦左乎鄭子產曰君子有四時朝以聽政晝以訪問夕
以修令夜以安身所以節宣其氣而勿使壅閉湫底以露其
體茲心不爽而昏亂百廢此語不可以易之也此一節無疑
方能課怠與敬辨義與利本心之善乃始明著而不習無不
利矣

其第三書云承喻爲學與業時異觀書辭誠有用功處但如
此懊惜亦甚害事臨淵羨魚不如退而結網懈怠流浪患不
覺耳覺即改之何暇懊惜大丈夫精神豈可自埋沒如此於
此邊疑不便是賴宜其在己未得平泰於事有不燭照于細
觀察有何滯礙爲仁由己有能一日用其力於仁我未見其
力不足者聖人豈欺後世誠之於此不決然獨進豈不忍去

其鄙吝之私。和飯蔬食飲水曲肱而枕之。樂亦在其中矣。在陋巷。簞食瓢飲。不改其樂者。亦人耳。誠之欲自棄邪。所示書稿三通。西美深甫書辭甚暢。至于宜書。則蒼東有病。此乃楊子嘉所謂屈於勝已者。而伸於不已若者也。

誠之篤信先生之學。亦嘗與朱子往來。淳熙十一年。朱子作曹立之墓表。論立之疑求心之學。辭氣抑揚。頗偏重於讀書。講論。包顯道等見之。深不以爲然。其實先生並非一於求心而不務講學者。故朱子以書來問。而先生答以亦好。未嘗駁議。而誠之恐彼此學徒競辯。或啓門戶之衆。致書朱子。勸其不可相激。朱子答書云。示喻競辯之端。三復惘然。愚意比來深欲勸同志者。兼取兩家之長。不可輕相詆訾。就有未合。亦且置勿論。而姑勉力於吾之所急。不謂乃以曹立之故。反有

所激如來喻之云也不敏之故深以自咎于靜平日所以自
任正欲身率學者一於天理而不以一毫人欲雜於其間恐
決不至如賢者之所疑也義理天下之公而人之所見有不
能盡同者正當虚心平氣相與熟講而徐究之以歸於是乃
是吾黨之責而向來講論之際見諸賢往往皆有立我自是
之意厲色忿詞如對仇敵無復少長之序禮遜之容至今懷
不滿云

諸葛受之誠之之兄也兄弟皆師先生受之信道之篤進學
之勇頗不及其弟先生嘗答書以勉之云某自承父師之訓
平日與朋友切磋輒未嘗少避爲善之任非敢奮一旦之失
信不遜之意徒爲無顧忌大言誠以時昔親炙師友之次實
切自反灼見善非外鑠徒以交物有蔽淪胥以凶大發愧

自此鞭策。驚塞不敢自弃。今契丈之賢。乃復猶豫於此。無乃反已未切省已未深見善未明以不能自奮也。倘一旦幡然沛然。誰得而禦。孟子曰。自謂不能者。自賊者也。幸勿久自屈抑。愚見如此。若有未安。幸詳見教。

邱元壽

邱元壽。福建邵武人。名未詳。年齒甚長。聞先生講學。負笈來從。執禮甚恭。嚴松錄先生語中一段云。邵武邱元壽。聽話累日。自言少時。獨喜看伊川語錄。先生曰。一見足下。知留意學問。且從事伊川學者。既好古如此。居鄉與誰遊處。元壽對以賦性冷淡。與人寡合。先生云。莫有令嗣。延師否。元壽對以延師亦不相契。止是託之二子耳。先生云。既是如此。平生懷抱。欲說底話。分付與誰。元壽對以無分付處。有時按視田園。老

農老圃雖不識字喜其真情四野之間與之相忘。酬酢居多耳。先生顧學者笑曰。以邵武許多士人而不能有以契元壽之心。契心者乃出於農圃之人。如此是士大夫儒者視農圃間人不能無愧矣。先生因言世間一種恣情縱欲之人。雖大狼狽其過易於拯救。却是好人。刻地難理會。松云如邱丈之賢。先生還有力及之否。先生云元壽甚佳。但恐其不大耳。人皆可以爲堯舜。堯舜與人同耳。但恐不能爲堯舜之大也。元壽連日聽教。方自慶快。且云天下之樂無以加於此。至是忽局蹴變色而答曰。荷先生教愛之篤。但某自度無此力量。不敢僭易。先生云元壽道無此力量。錯說了。元壽平日之力量。乃堯舜之力量。元壽自不知耳。元壽默然愈感。退松別之。元壽自述自聽教於先生甚樂。今胸中忽如有物梗之者。姑抄

先生文集歸而求之再來承教

曾敬之

曾敬之名未詳里居官階亦無可考師事先生好作文先生嘗以書戒之云爲學日進爲慰讀書作文亦是吾人事但讀書本不爲作文作文其末也有其本必有其末朱子間有本盛而末不茂者若本末倒置則所謂文亦可知矣適出書不時復

仲誠

仲誠名未詳里居官階亦無考疑亦金谿人早事先生於槐堂又及事梭山先生則非遠方學者矣先生語錄記徐仲誠請教先生使思孟子萬物皆備於我反身而誠樂莫大焉一章仲誠處槐堂一月一日問之云仲誠思得孟子如何仲

云如鏡中觀花。答云見得仲誠也。如此顧左右曰。仲誠真善自迷者。因說與云。此事不在他求。只在仲誠身上。既又微笑而言曰。已是分明說了也。少間仲誠因問中庸以何爲要語。答曰。我與汝說。內汝只管說外。良久曰。句句是要語。梭山曰。博學之。審問之。謹思之。明辨之。篤行之。此是要語。答曰。未知學博學什麼。審問個什麼。明辨個什麼。篤行個什麼。

曾友文

曾友文名未詳。少聰穎。應試不售。以相人術遊於士大夫家。先生愛其才。勉令爲學。贈以言曰。德成而上。藝成而下。生占辭論理得道經史未見牴牾。乃獨業相人之藝。藝雖精。下矣。生書又能自悼。時昔之顏頤稱引孟子無以小害大。無以賤害貴之言。年又尚少。則舍其舊而新。是圖此其時也。生其勉。

之友文感先生之言發憤爲學卒爲善士云

繆文子

繆文子名未詳里居官階無考惟見李敏求錄先生語云繆文子資質亦費力幕外尤殫每見他退去一似不能脫羅網者天之所以予我者至大至剛至直至平至公如此私小做甚底人須是放教此心公平正直無偏無黨王道蕩蕩無黨無偏王道平平無反無側王道正直某今日作包顓道書云古人之學不求聲名不較勝負不恃才智不矜功能今人之學正坐反此耳又云人須是開時大綱思量宇宙之間如此廣濶吾身立於其中須大做一個人文子云某嘗思量我是一個人豈可不爲人却爲草木禽獸先生云如此便又細了只要大綱思且如天命之謂性天之所以命我者不殊乎天

須是放教規模廣大。若尋常思量得。臨事自省力。不到得。被
陷溺了。文子云。某始初來見先生。若發蒙然。再見先生。覺得
心下快活。凡事亦自持。只恐到昏時。自理會不得。先生云。見
得明時。何持之。有人之於耳。要聽即聽。不要聽。則否。於目亦
然。何獨於心。而不由我乎。

張次房

次房。臨川人。初師事文達公。嘗居官。有列於朝。棄官歸。問
學於先生。莫詳其名。惟見嚴松年錄先生語。有云。臨川張次
房。下厝子賦歸去來辭。棄官而去。杜門經歲。來見先生。先生
云。近聞諸公以王謙仲故。推輓次房一出。是否。次房曰。極荷
諸公此意。愧無以當之。先生云。何荷之云。君子之愛人也。以
德。細人之愛人也。以姑息。凡諸公欲推輓者。姑息之愛也。

次房初歸時一二年間正氣甚盛後來痿弱先生教授極力推挽是後正氣復振比年又痿衰次房莫未至無飯喫否若令諸公此舉勢亦難行反自取辱耳某今有一官不能脫去得今又令去荆門某只得去若竄去南海某便着去次房幸而無官了而今更要出來做甚麼次房云恨聞言之晚不能早謝絕之也按語錄所記先生有荆門之命是時王謙仲已由江西帥入爲樞密使位已尊矣而在朝諸公以謙仲故欲輓次房是次房與謙仲交好而其官亦不卑矣又云恨聞言晚不能謝絕是以諸公推輓而復出也然不可考矣

曾充之

曾充之未詳其名貫惟包顯道錄先生語云曾充之來問學先生曰公且說爲誰打開節來只此是學又無事尚解忘今

當機對境乃不能明云云先生知其隱事則亦近地之學者也

鄭學古

鄭學古名貫亦未詳惟李敏求錄先生語云先生因論補試得失先生云今之人易爲利害所動只爲利害之心重且如應舉視得失爲分定者能幾大往往得之則喜失之則悲惟曹立之萬正淳鄭學古庶幾可不爲利害所動故學者須當有所立免得臨時爲利害所動

劉季蒙

劉季蒙名貫未詳先生贈序自署壬子月日蒙泉守陸某則先生守荆門時來問學者也其造詣不可知觀先生序言明德在我何必他求方士樺伯真爲大業無世俗之陷溺無二

崇之迷哉。所謂無偏無黨。王道蕩蕩。浩然宇宙之間。其樂孰可量云云。豈其人天資高明。已造此境。抑初知向往。猶徘徊於岐路耶。

周康叔

周康叔名未詳。或云先生同里人也。包顯遵錄先生語云。周康叔來問學。先生曰。公且說扶渡子訟事來。蓋先生教人務求躬行。不專講論。故於來問學者。並直指其心。害之病。令惕然求其本心。庶知所愧厲而卓然有以自立也。

程敦蒙

程敦蒙名未詳。里貫亦無考。惟見先生語錄。蓋與朱季繹。楊子直同侍學於先生者也。

江泰之

江泰之名未詳里貫亦無考。或曰金谿人或曰貴溪人。先生語錄載泰之問。某每慙忿室慙。求其放心。然能暫而不能久。請教。答曰。但慙忿室慙。未是學問事。便慙忿室慙。得全無後。也未是學。學須是明理。須是知學。然後說得慙室。知學後慙室與常人慙室不同。常人慙室只是就事就末。

郭邦逸况邦瑞

郭邦逸名未詳。里貫亦無考。先生年譜載先生答邦逸書。在紹熙元年。先生居象山方丈時。而書中謂偶有姪婦之喪。不得占復。又謂山間朋友雲集。不可久孤其望。是先生暫還家。而邦逸以書來問學於家者。書中云。垂示晦翁問答。是嘗問學於朱子心有所疑。而轉問於先生也。朱子續集載答郭邦逸書。無論學語。不知其所言云何。今錄先生答邦逸書云。專

价奉書細視。絨題如揖。盛德亟發。讀之。慰浣良劇。教以大射。一本尤深降款。鑿鑿精實。非泛泛場屋之文也。君子義以爲質。得義則重。失義則輕。由義爲榮。背義爲辱。輕重榮辱。惟義與否。科甲名位。何加損於我。豈足言哉。吾人所學。固如此。然世俗之所謂榮辱輕重者。則異於是。薰染其間。小有不辯。則此義爲不精矣。當使日著日察。炯然不可渾亂也。則善矣。番示晦翁問答。良所未喻。聖人與我同類。此心此理。誰能異之。孟子曰。人皆可以爲堯舜。又曰。至於心。獨無所同然乎。又曰。人之有是四端。而自謂不能者。自賊者也。謂其君不能者。賊其君者也。今謂人不能。非賊其人乎。居仁由義。大人之事備矣。吾身不能居仁由義。則謂之自棄。聖人於此理。不勉而中。不思而得。賢如顏子。猶未至於不思不勉。曰三月不違。則猶

有時而違也。曰有不善未嘗不知。知未嘗復行。則言其不逮而復也。然則雖未至於不思不勉而思勉之工益微矣。氣稟益下其工益勞。此聖人賢人衆人之辨也。語云。顏子三月不違仁。其餘則日月至焉而已矣。日月至三月不違。與至誠無息。則有間矣。若其所至所不違。所無息。豈容有二理哉。古人惟見得此理。故曰。予何人也。舜何人也。有爲者亦若是道也者。不可須臾離也。可離非道也。是故君子戒謹乎其所不覩。恐懼乎其所不聞。學者必已聞道。然後知其不可須臾離。知其不可須臾離。然後能戒謹不覩。恐懼不聞。元晦好理會文義。是故二字也不曾理會得。不知指何爲聖賢地位。又如何爲留意。此等語皆是胸襟不明。故誤得如此意見。非唯自惑。亦且惑人。盛价至此。偶有姪婦之喪。又賤體中暑。連日不得

占復山間朋友雲集亦不可久孤其望勢當一往又縣宰終
滿與之爲別諸事紛擾亟取紙作復遠甚不能倫理近有復
元晦書錄往一觀及有史評一首又有書二本宜章學王文
公祠二記併錄呈得暇精觀之亦可以見統紀也

郭邦瑞邦逸之兄名亦未詳先生與書謂新天子陞黜殊乖
物望欲其糾劾處革要者蓋在光宗紹熙初年而朱子續集
有答郭邦瑞書謂抗疏觸邪遂去言職是邦瑞因先生之言
而徑上疏也今錄先生與邦瑞書於後云前此辱令弟邦逸
遣人臨存復書中托拜意近亦嘗得家問否今爲况如何新
天子登極海內屬目而風憲之地陞黜殊乖物望非細故也
山林之人但以草野與議言之耳未知修門之內其議論又
何如也良心正性人所均有不失其心不乖其性誰非正人

縱有乖失思而復之何遠之有。不然是自昧其心自誤其身耳。及處華要而不知改。是又將誤國矣。有能明目張膽而糾正之者乎。有能惻怛豈弟以感悟之者乎。區區周鑒之心。猶不能無望於左右。別後遷除未足爲門下言也。姪孫蔭處大學家書戒令求見。此子近亦少進於學。幸與進以子弟視之可也。又攷紹熙三年監察御史郭德麟以察事左遷。德麟二字與邦瑞叶。疑即其人也。又攷朱子答邦瑞書稱其清名直節足爲里閭光寵。意邦瑞非新安即建安人矣。

朱季繹

朱季繹名未詳。先生與包顯道書云。朱繹之婦不及作書。繹之恐是季繹名。則亦南城人也。與李伯敏同從學於先生。故僅見於伯敏所錄語中。先生以其好主張已見。又好辨異端。

偏於講論。先生嘗謂季繹即是異端。欲救其失也。朱子與門人書亦舉先生此言。謂朱季繹亦其所指爲異端者。不知何如。蓋先生所謂異端。不專指二氏。先生嘗謂人同此心。心同此理。又云。同此之謂同德。異此之謂異端。季繹多立意見。好多辯論。故以異目之。非謂其有他也。伯敏所記。稱朱季繹云。如敬肆義利之說。乃學者持已處事所不可無者。先生云。不曾行得。說這般閑言語。則甚如此不已。恐將來客勝主。以辭爲勝。然使至此。非學者之過。乃師承之過也。朱云。近日異端邪說害道。使人不知本。先生云。如何。朱云。如禪家之學。人皆以爲不可無者。又以謂形而上者。所以害道。使人不知本。先生云。吾友且道甚底是本。又害了吾友甚底來。自不知己之害。又烏以知人之害也。包顯道常云。人皆謂禪是人不可無。

者。今吾友又云害道。兩箇却好縛作一束。今之所謂害道者。却是這閑言語。

伯敏又記先生語。謂先生嘗謂敏求云。人要知我之所有者。伯敏云。非僻未嘗敢爲。先生云。不過是硬制在這裏。其間有不可制者。如此將來亦費力。所以要得知天之于我者。看吾友似可進。緣未曾被人閑言語所惑。從頭理會。故易入。吾先入者爲主。如一器皿。虛則能受物。若垢汙。先入後雖欲加以好水。亦費力。如李繹之學。駁雜。自主張學問。却無奈何。一日伯敏問云。以今年校之。去年殊無寸進。先生云。如何要長進。若當爲者有時而不能爲。不當爲者有時乎爲之。這箇却是不長進。不恁地理會。泛然求長進。不過欲以已先人。此是勝心。伯敏云。無箇下手處。先生云。古之欲明明德於天下者。先

治其國。欲治其國者。先齊其家。欲齊其家者。先修其身。欲修其身者。先正其心。欲正其心者。先誠其意。欲誠其意者。先致其知。致知在格物。格物是下手處。伯敏云。如何樣格物。先生云。研究物理。伯敏云。天下萬物不勝其繁。如何盡研究得。先生云。萬物皆備於我。只要明理。然理不解。自明須是。陸師親友伯敏云。此間賴有季繹時相勉勵。先生云。季繹與顯道一般。所至皆勉勵人。但無根者多。其意似欲私立門戶。其學爲外。不爲已。世之人。所以攻道學者。亦未可全責他。蓋自家醫其聲色。立門戶。與之爲敵。噉噉膝口。實有所未孚。自然起人。不平之心。某平日未嘗爲流俗所攻。攻者却是讀語錄。精義者。程士南最攻道學人。或語之以某程云。道學如陸某。無可攻者。又如諸公。義均骨肉。蓋某初無勝心。日用常行。自有使。

他。一。箇。敬。信。處。

羅進士獻

羅獻字章夫建昌南豐人登慶元二年丙辰科進士早歲師
事先生比登第時先生卒已四年不及見矣其歷官未詳先
生勉其進學嘗與之書云著是去非改過遷善此經語也非
不去安能著是過不改安能遷善不知其非安能去非不知
其過安能改過自謂知非而不能去非是不知非也自謂知
過而不能改過是不知過也真知非則無不能去真知過則
無不能改人之患在不知其非不知其過而已所貴乎學者
在致其知改其過也

陸子學譜卷之十五

南昌萬承蒼訂

後學臨川李 紱編

平越王士俊校

弟子十

吳顯仲

吳顯仲名未詳。里居官階亦無考。然先生答顯仲書謂包顯
道歸。遣此為復。則必建昌南城人也。其第一書云。屬承訪逮。
蓋負笈及門者。先生語錄中一段云。顯仲問某何故多昏。先
生曰。人氣稟清濁不同。只自完養。不逐物。即隨時清明。纔一
逐物。便昏眩了。顯仲好懸斷。都是妄意。人心有病。須是剝落。
剝落得一番。即一番清明。後隨起來。又剝落。又清明。須是剝

落得盡方是因語顯仲云風恬浪靜中滋味。溪長人資性長。短雖不同。然同進一步則皆失。同退一步則皆得。問傳季魯如何而通。如何而塞。因曰某明時直是明。只是懈怠時即塞。若長鞭策不懈怠。豈解有塞。然某緩遇塞時。即不少安。即求出。若更藉朋友切磋求出。亦鈍甚矣。所以淹没人。只用說閑話之類。亦能淹人。某適被顯仲說閑話。某亦隨流不長進。亦甚然。通時說事亦通。塞時皆塞。

先生與吳顯仲書云。屬承訪遠。深見嗜學之誠。顧某謬無以塞盛意。爲別未幾。已有思詠。便風得書。承比辰進修。多福爲慰。顯仲質朴甚可嘉。爲學固不可迫切。亦當有窮究處。乃有長進。若能隨分窮究。廢弛豈所患也。又所依得賢主人。不患無浸潤之益也。凌遽占復。莫既所懷。惟勉學自愛。

其第二書云得書讀之其辭與鄉時書辭不相類。佳。平常受帖無甚病。瘳。但恐亦是偶然耳。若果如此。自能隨時學問。不患無益。縱無甚益。亦不至有謬戾也。况朝夕得親炙黃丈。又得與濟先相處。不可謂乏師友也。包顯道歸。遺此爲復。其究所欲言。惟勉學自愛。

顯仲頗留意文藝。而嘗以不能工爲念。先生答書云。得書承比來履用佳適。進學不替。爲慰。來書見所學。仍見敦道說。頗以藝能不如人爲憂。此甚非也。當書論語弟子入則孝。出則弟。一章。併子夏賢賢易色一章。於几案間。朝夕觀省。以改前過。讀書作文之事。自可隨時隨力作去。才力所不及者。甚不足憂。甚不足耻。必以才力所不可強者爲憂。爲耻。乃是喜夸好勝。失其本心。真所謂不依本分也。

馮傳之

馮傳之名未詳。或云即楊慈湖妹壻名象先者。未知是否。其官階無可考。而先生答書有已遂改秩自此進用之語。則亦非徒一命也。傳之敬服先生。論人物不必相識。但據其言論。即知其心。見先生答王頌伯書。又先生與薛象先書。論舊同官傳之與焉。則與先生在教局時相問學者也。其書謂傳之氣質恢傑。吾甚愛之。恨向來相聚日淺。不能養其大端。若只如此。恐不濟事云云。蓋期望之意甚切。又嘗答傳之書。言春末在郡城。閱邸報。竊知已遂改秩。自此進用。吾道之幸。敢不贊喜。吾人仕進。自有大義。所貴乎學者。以明此義耳。不學者。固不足道。號爲學者。而又牽於俗論。私說。則是義猶未明。私猶未徹耳。來教謂不可爲外面擾動。是矣。若貶貶然。頗流俗。

之議論則安在其爲知道明義也。計利害計毀譽二者之爲私均也。大哉聖人之道。洋洋乎發育萬物。峻極于天。優優大哉。天之所以爲天者。是道也。故曰。唯天爲大。天降衷於人人受中以生。是道固在人矣。孟子曰。從其大體從此者也。又曰。養其大體。養此者也。又曰。養而無害。無害乎此者也。又曰。先立乎其大者。立乎此者也。居之謂之廣居。立之謂之正位。行之謂之大道。非居廣居立正位行大道。則何以爲大丈夫。傳之氣質。慨乎似道。顧恐不志其大。而臨溪爲高。加少爲多耳。願益勉旃。無苟自盡。則吾道幸甚。先生又嘗與劉志甫書。亦勸其勉勵。傳之蓋奉奉於傳之也。

鄭文肅湜

鄭湜字溥之。閩縣人。列僞學禁中。福州府志云。乾道進士。慶

元初以起居直學士草趙汝愚罷相制有扶危定傾任忠竭
節詰韓侂冑大怒出知本州後召入爲刑部侍郎卒諡文肅
先生答鄭溥之書云趙仲聲歸奉書慰浣之劇竊知晉丞大
府此亦未足以處賢者今當復有清切之除矣屏居者未之
聞耳往年山間粗成次第便有西山之遊相繼有事役殘歲
遂不得一登比來朋友復相會集月朔除一小功報復即登
山爲久駐之計去冬與邵機宜一書頗究爲學本末今往一
觀遊仙巖題新興寺壁數語頗足以見居山之適臘月得元
晦復論太極圖說書彙以一書復之今併往此老才氣英特
平生志向不沒於利欲當今誠難其輩第其講學之差蔽而
不解甚可念也士論方伸誠得此老大進此學豈不可慶誠
者非自成已而已也所以成物也此心之靈苟無壅蔽昧沒

則痛癢無不知者。國之治忽。民之休戚。葵倫之歎。敦士大夫
學問之是非。心術之邪正。接於耳目而冥於其心。則此心之
靈。必有壅蔽昧沒者矣。在物者亦在已之驗也。何往而不可
以致吾反求之功。此所願與同志日切磋而不舍者。文藻特
薄之餘事。比來議論節操。凜凜近古。願加不怠之誠。日致充
長之功。則吾道幸甚。道之行不行。固有天命。吾人之學安得
而不自致哉。某向嘗妄論賢者封事。不逮奏篇。蓋愚意以爲
但當因天變疏陳。缺失以助主上修省之實。不必曲推事驗
如後世言災異者。嘗見元祐三年呂益柔廷對有曰。昔之言
災異者多矣。如劉向。董仲舒。李尋。京房。翼奉之徒。皆通乎陰
陽之理。而陳於當時者。非一事矣。然君子無取焉者。爲其著
事應之說也。孔子書災異於春秋。以爲後王戒。而君子有取

爲者爲其不著事。應故也。夫旁引物情。曲指事類。不能無偶。然而合者。然一有不合。人君將忽焉。而不懼孔子於春秋著災異不著事實者。實欲人君無所不謹。以答天戒而已。其言雖未精盡。大概可謂得矣。如乍警乍縱。不能統一之言。可謂切當。至於雲將族而復散。雨將下而復止。爲天意象類而然。則愚以爲不必如此言也。又如證以仁祖。露立事。亦恐於本指未相應。更願精思之。格君心之非。引之於當道。安得不用其極。此責難所以爲恭。而不以舜之所以事堯。事君者所以爲不敬其君也。思慮審精。每及一事。既舉綱領。又詳其條目。使立可施行。此溥之所長也。然其本末偏重。實未一貫。故原根處。雖若精絕。終篇讀之。却覺渾亂。無統臨運率之勢。萬物並育而不相害。道並行而不相悖。小德川流。大德敦化。必舉

綱領卓然後能及此也行百里者半九十願看鯨焉

先生卒於荆門年譜載江淮總領鄭湜祭文止存其畧後見
任希夷伯起所爲斯恭集有代江淮總領鄭湜祭陸荆門文
云嗚呼道晦難明學絕誰續人而有志命何不淑伊昔中州
有來二陸奮跡江介翺驚振鵠家庭之行世想其風賢關之
美翕然景從聲實方盛長公云公君益自振耀然有光聖去
千載所傳者書君獨深造忘其緒餘謂心至靈可通百聖外
物雖繁在我能鏡欲世知師欲人知味未之能行慨其將廢
若夫素懷尤其經濟武事兵書抵掌論議英明通達事物無
細自以無前曾未用世豈不登朝惟監之貳一麾荆門僅爾
小試增城浚遑爲國遠慮所懷何長所事未旣顧念疇曩晤
言朝夕分處江湖歲年屢易忽聞訃音悲悽慘愴王事方殷

莫芻莫姓。緬言象山無復湮滅。白雲英英。瞻望永訣云云。蓋伯起是時爲溥之幕職。故代爲此文也。伯起從學朱子。其後入參政府。依違史氏相業。無可稱。然當陸子歿時。正其師與陸子辯無極。忿爭之餘。其爲此文。乃推崇陸子如此。其至。雖代作之文。意本主人。溥之之得於陸子者。固深。而伯起亦可謂知足以及之矣。

趙景昭

趙景昭名貫。未詳。其兄景明。名熿。先從學於呂伯恭。蘇來爲撫州守。景昭與先生爲同年進士。在臨安與先生相款。亦有意於學者。以省兄至撫。逮來問學。鵲湖之會。景昭從行。與聞講論。深相信服。景昭官階所至。無可考。其除授大理司直也。先生嘗以書勉之云。新除極爲贊喜。邦之司直。非兄其誰與。

歸刑官。古人所重。臯陶尸陳謨論道之任。而舜命作士。今司直之名。猶在大理。又適爲賢者進用之階。殊令人增慕古之懷。今日法制未容人遽實其名。然珠藏淵媚。兄必有以處之矣。

張季忠

張季忠名貫。未詳。從事先生。勇往力學。爲同輩所推服。先生嘗與季忠書云。聞元忠說。友朋間唯季忠篤志不懈。甚爲之喜。人苟有志於學。自應隨分有所長益。所可患者。有助長之病耳。雖古聖賢尚不能無過。所貴能改耳。易稱顏子之賢。曰有不善未嘗不知。知之未嘗復行也。由是觀之。則顏子亦不能無不善處。今人便欲言行無一不善。恐無是理。往往只是好勝。每事要强。人要人檢點。不得不知此意。已與古人背馳。

矣。若無此意。但寬平隨分去。縱有過。亦須易覺。易改。便未覺。未改其過。亦須輕。故助長之病。甚於忘。季忠之意。忘病自少。所患有助長之病。雖未加益。亦自平穩。况必不能不有益耶。
按雖未加益之上。似有脫句。

葛少良

葛少良。金谿人。未詳其字。其兄名逢時。字才美者。能文章。有聲庠序。與文達公同年成進士。其父名賡。字德載。有德量。而材武過人。屢破山賊。有功於鄉黨。以子貴。封宣義郎。致政。知敬禮先生故。少良與第四兄宗允並師事先生。見先生所爲。其父葛致政公墓誌。

劉志甫

劉志甫。名貫。無考。先生答書言其與王順伯相繼入冊府。則

文學侍從之列也。先生書辭勉勵甚切。期以成物。欲其切磋。
馮傳之。則所造高矣。今錄先生答書於後。

趙仲聲還得書讀之。渙然。溪用慰悻。顧伯與足下相繼入冊。
府亦前時所無。求外想亦未容遽也。誠者非自成已而已也。
所以成物也。成已仁也。成物知也。性之德也。合內外之道也。
交遊間氣質不至扞格者。當日有麗澤之益。此其爲進德之
驗。若著馮傳之氣稟。慨然當今難得。所當共愛惜之。向來相
聚。失於懶散。不曾與之落其大端。去歲嘗有一書勉之。近得
其書。殊覺其邁然。不相入。淚爲惋惜。志甫尚能致力於此乎。
今錄向來書。冀去若致力切磋。庶有其端也。近與春伯一書。
痛箴其陋。習習有能索觀之爲佳。道之行不行。固天也。命也。
至於講明。則不可謂命也。知言者。亦何必俟其效之著而知。

其所到哉。此心本靈。此理本明。至其氣象所蒙。習尚所格。俗論邪說所蔽。非加剝剝磨切。則靈且明者。曾無驗矣。

顏子堅

顏子堅名貫。未考。往來問學於朱陸二先生。一日棄儒服爲僧。先生絕之。嘗與詹子南書云。顏子堅既已去髮。非吾人矣。此人質性本亦虛妄。故卒至於此。按子堅自棄本不足錄。而後之妄人如陳建輩。輒借子堅以詆先生。不知先生固已絕之。且子堅亦嘗問學於朱子。其答子堅書現存大全集中。豈亦足累朱子耶。故存其人而辯之。如此子堅既爲僧。猶以書來講學。先生答之云。向在八石時。嘗納區區之忠。既而子堅用節級。諸人推轂。遂變儒服。端以爲迂拙之言必蒙見棄。屬者屢蒙見過。每於鄙言謂有所啓。追念時昔爲之慨然。乃知

高明終當遠到。豈遽不能明衆人所同知之過哉。蓋先生辭婉而責之深。終望其改過而反歸於正也。

李季遠

李季遠名貫。未詳。止見於先生答包詳道書云。近得李季遠書。盛陳別後爲學工夫。大抵以爲朝夕不辭涵泳。甚有日新之意。又以詳道以本無事之說排之。渠又論不可無事之故。某復書云。所示與詳道議論不合之處。皆是講學不明。人持所見以爲說。用相切磋。殆如兒戲。今此得信。又有與敏道異同之論。要亦是兒戲耳。精勤不懈。有涵泳玩索之處。此亦是平常本分事。豈可必將無事之說排之。如讀書接事間。見有理會不得處。却加窮究。理會亦是本分事。亦豈可教他莫要窮究。理會若他持此說者。元無着實。但是虛意。篤說立議論。

無益於事實亦須窮見其底蘊。只就他虛意無實處理會。豈可以一說攻一說如詳道來書甚見已學不明。但就虛說之病按先生此書李遠與詳道講論往復則李遠亦南城人與包氏兄弟同來侍學者也。

廖幼卿兄懋卿

廖幼卿名未詳與兄懋卿並師事先生其里居官階無考然觀先生答幼卿書謂懋卿與傅仲昭相聚疑二廖亦南城人也今附先生答幼卿書於後

適聞傅仲昭語及懋卿坐間假寐仲昭以爲此必未能自拔此殆不然仲昭未知此理非但仲昭未知此理料幼卿亦未知此理人未知學其精神心術之運皆與此道背馳一旦聞正言而知非則向來蹊徑爲之杜絕若勇於惟新固常精神

筋力皆勝其舊然如此者難得但得不安其舊雖未有日新亦勝頽然不知與主張舊習者遠矣今懋卿雖未有日新之功若其困睡則是已知舊見舊習之非不復沈其上主張運用故如此耳此不足爲誤害但少俟之徐觀其幡然則大善矣朋友間不誤知此理迫之太甚罪之太切則又反爲害矣

李伯誠

李伯誠名貫未詳或云慶元人也與楊袁沈舒四君子同事先生意湖道書有代李伯誠祭先生文云某於象山先生文安公受罔極之恩片言頓覺如脫桎梏清明光大到於今日用云爲變化夫人之喪承訃後時今既襄奉既禔祥矣茲敢敬致三牲之禮于文安公暨夫人几筵之前日月遷流斯覺未嘗流死生雖異斯覺未嘗異言辭有極斯覺無極欲報之

德昊天罔極。觀此文之辭。雖出慈湖代作。然伯誠受教亦已。深而所造亦已高矣。或又謂伯誠即先生集中所與書之省幹也。

張進士宏

張宏字元度。臨川人。先生晚年始來從學。中嘉定十一年進士。慈湖遺書有贈元度序文云。臨川張元度以鄉舉至禮部。持陸先生書。踵門就見。其辭氣已知其誠。確可敬。及復見。益知其篤志已學。蓋夜則收拾精神。使之於靜。某曰。元度所以有本自成全。何暇更求。視聽言動不學而能。惻隱羞惡恭敬是非。隨感輒應。不待詔告。清明在躬。廣大無際。精神四發。不疾而速。不行而至。收之拾之。乃成造意休之。靜之。猶是放心學問之道。無他求其放心而已矣。吾心本無妄。舍無妄而更

求乃成有妄故曰無妄之往何之矣元度猶自以爲未能無過某曰有過惡即改元度精神何罪而收拾之元度既以爲然矣告別復求書數語以歸某索之胸中實無說足以稱塞來意辭之不獲乃敍其畧而又告之曰元度好賢樂善孜孜如不及某堅謂元度自賢自善何所更疑而猶待他人爲淳熙丁未正月二十二日書於寶山官舍按此時蓋元度初舉於鄉如京師應省試也

陳去華

陳去華未詳其名廣東廣州人師事先生天姿甚高而年不永先生深惜之嘗論及門之士必稱去華嚴松年錄先生語云廣東一學者陳去華省發偉特某因問吾與點也一段事常如何理會屢問之去華終以爲理會不得一日又問之去

華又謂理會未得某云且以去華所見言之其未至全然曉不得去華遂謂據某所見三子只是事上着到曾點在這裏着到某語之曰向道理會不得今又却理會得去華頗有省自欽聽話一月前十日聽得所言皆同後十日所言大異又後十日與前所言皆同因有十詩別後謂人曰某方是一學者。在待歸後率南方之士師北方之學蓋廣中紫欽夫之教故以此爲北方耳。

劉德固

劉德固名貫未詳與胥必先同事先生則必金谿人也先生與胥必先第二書云劉德固須尚留山間前此未得渠同讀書但說得比卦稍詳言亦政不必遽爾多讀讀書最以精熟爲貴煩喻德固且熟讀比卦爲佳德固前此於文義間

多未通曉、近所以開發之者、非在文義、每爲德固解說、必令文義暢明、欲不勞其思索、不起其疑惑、便未不害本文、不妨實常、令文義輕而事實重於事實、則不可須臾離於文義、則曉不曉不足爲輕重、此吾解說文義之妙旨、必先亦不可不知也、然此亦豈可強爲之哉、非明實理有實事實行之人、往往乾沒於文義間、爲蛆虫識見、以自喜而已、安能任重道遠、自立於聖賢之門墻哉、

馮元質

馮元質名貫亦未詳、止見先生語錄中、蓋與朱季暉楊子萬同時來問學者也、

陳師淵

陳師淵名貫亦未詳、惟見先生翠雲題壁所謂陳師淵作飯

洪者也。按翠雲寺在雲林山。是日許昌朝胡無相劉伯協等從先生同遊者甚衆。而師淵獨具飯。自非地主不能然。則師淵亦金谿人也。

倪伯珍

倪伯珍名貫未詳。蓋結廬象山之上。而師事先生。蓋亦同郡或信州人耳。先生與吳子嗣書云。近得周元忠書。謂伯珍伯珍諸人有意遣與夫相迎。時伯珍等俱在象山也。先生題伯珍所居曰愈高。蓋其所結之廬在象山最高處耳。先生與黃循中書謂與晦翁往來書錄。往伯珍葬輔會次。幸示之。蓋諸人皆結廬山中者也。

祝才叔

祝才叔名貫未詳。或曰臨川南櫟人。結廬象山之上。從先生

問學先生題其所居曰規齋才叔因以爲號凡先生爲諸弟子題象山結廬齋額並見淳熙十四年先生四十九歲年譜

李德章纓

李纓字德章臨川人初從學於文達公復齋先生旋與文達公同中乾道五年己丑科進士後乃兼事先生西江志曾極傳云遠近學者宗陸氏之學自極之父滂與李德章師復齋始二人與先生兄弟年輩相等而能屈己以從首崇師道爲里閭率先蓋皆有識之士卓然不囿於流俗者也

吳君玉

吳君玉名賈未詳或云臨川人即淳熙十年甲辰科進士吳琮或云名鑑即葉水心所薦於執政三十四人之一也君玉至槐堂從學乃先生三十四歲成進士後初歸家講學時君

王天姿高明。嚴松年記先生語云。先生言吳君王自負明敏。至槐堂處五日。每舉書句。爲問。隨其所問。解釋其疑。然後從其所曉。敷廣其說。每每如此。其人再三稱歎云。天下皆說先生是禪學。某獨見得先生是聖學。然退省其私。又却都無事。又云。此人明敏。只是不得久與之切磋。

趙子新

趙子新名貫。未詳。少年從學。先生甚稱之。嚴松年錄先生語云。先生嘗稱歎趙子新美質。謂人莫不有夸示已能之心。子新爲人稱揚。反生羞愧。人莫不有奸進之心。子新恬淡。雖推之不前。人皆惡人言己之短。子新惟恐人不以其失爲告。羣居終日。默默端坐。除有以律夫氣習之澆薄者多矣。可謂人中之一瑞。但不能進學爲可愛耳。或云。年亦未壯。答云。莫道

未也二十歲來一日子新至語之曰莫堆堆地須發揚卓前
不能令人軒車後不能令人輕何不發揚

童伯虞

童伯虞名貫未詳或曰南城人蓋音註柳文名宗說者之族
人也幼事文達公後事先生時先生秋試未爲考官所取則
從學之年在乾道元年乙酉歲之前先生答書年譜亦載於
乙酉蓋從學較他門人爲最早矣書中稱其趨向不凡爲環
所居數百里間所不多有又謂處其館幾半載則非同郡人
即建昌人矣今附先生答伯虞書於後云某秋試幸不爲考
官所取得與諸兄諸姪切磨於聖賢之道以滓昔非日有所
警易荆棘陷穽以康莊之衝反羈旅乞食而居之於安宅有
足自慰者足下往年心期於子兄子壽今年又與僕相處趨

向固不凡。近環吾居數百里間。前此蓋不多。若足下者。然僕處足下之館。幾半載。而不能回足下眷眷聲利之心。此誠僕淺陋之罪。曾子曰。視其庭。可以搏鼠。烏能與我歌乎。仲尼顏子之所樂。宗廟之美。百官之富。金革百萬之衆。在其中。豈可以二用其心。而期與富貴利達兼得之者哉。記曰。富潤屋。德潤身。孟子曰。趙孟之所貴。趙孟能賤之。又曰。仁義忠信樂善不倦。此天爵也。公卿大夫。此人爵也。孟子之時。求人爵者。尚必修其天爵。後世之人。求人爵。蓋無所事於天爵矣。捨此而從事於彼。何啻養一指而失其肩背。况又求之有道。得之有命。非人力所可必致者。而反營營汲汲於其間。以得喪爲欣感。亦甚矣。子思曰。人皆曰。予智。驅而納諸罟獲陷阱之中。而莫之知避也。來書謂無我笑。此僕之所憫惜。非所笑也。足

下雖不言。僕固知之深矣。向僕既不能舉。聞足下領試。亦不中。甚欲即書一紙爲足下言之。因循不達。比來此念尤切。方此圖之。竟爲來書所先。輒布此爲復。

喬德占

喬德占名貫未詳。惟先生答書。鞭策甚嚴。蓋亦有志於學。而未能實用其力者也。今附先生與德占書於後云。某侍下。粗造無足道者。披讀來示。情文煥然。如昔者之見德占。未之有改。不唯不改。抑似有益甚者。故以爲學日知其難。過失日覺。其多朝夕恐懼。非不鄙無似。以爲可語。安肯及此。愚見所及。不敢自外於左右。所謂知難。覺過者。蓋未知其難。未覺其過。而恐懼者。非所以爲恐懼也。誠能知過知難。知恐懼。則雖無此言千里之外。尺書之間。當必有其驗矣。潛雖伏矣。亦孔之

昭誠之不可掩固如此。此過不除。學者大患。不然則如所云。者。適足以增其驕。益其疾而已矣。將有窮年卒歲。愈驚愈遠。而不自知者。甚可懼也。

庚先生三歲失母。二十四歲丁父憂。三十九歲丁繼母憂。此書侍下粗達。則德占從學。亦在先生早年。

胡無相

胡無相。臨川人。生而聰慧。名妙明。撫州府志云。少時遇一僧。教其面壁靜坐。遂有領悟。能文。自號無相。名公卿多與之交。衆山先生講易。一日無相亦來聽講。先生問理會得否。對曰。三畫未分。露消息。六爻纔動。錯商量。意識當時章句。訓詁者。穿鑿也。先生頗許之。自是來侍學。嘗偕劉伯協。許昌朝等侍。先生遊雲林山之翠雲寺。無相爲茶供。見先生題翠雲寺壁。

晚年結菴常清觀。脩然自得。常以書寄先生。憫俗學溺意見。先生答之云。惠書愛憫俗學。傷悼邪見。汲中時病。惟是推許。過盛。非所敢承。劉定夫得數日之款。張誠子廸試期不及一見。但得訊云。回日見過。定夫亦約早晚登山。山間朋友近多讀尚書。上古道義素明。有倡斯和。無感不通。只是家常茶飯。今人既惑於利祿。又蔽於邪說。見說此理。翻成特地。豈不可憐哉。

按無相早年雖從僧人爲禪學。實未嘗爲僧。不過如朱子問禪於妙喜耳。撫州府志遂列之方外。而稱之以僧誤矣。如果爲僧。則陸子書記豈不一語及之哉。如顏子堅則斥爲非復吾人。何獨畧於無相。竊意過僧面壁。亦不過因其名字之異。而傳會之。未必實有是事也。

董元錫

董元錫名貫未詳。從學於先生。又師事文達公。疑亦金谿人也。初元錫以書問學。謂知己難得。又謂疾小人如仇。先生答書云。元錫舊常有向學之意。而中自盡。每切念之。無由奉達。今因此輒致區區。幸少垂聽。往訓中言小人者甚多。不可一概觀。小人字雖同。而其所指。乃有相去天淵者。論語所謂女爲君子儒。無爲小人儒。又曰。言必信。行必果。硜硜然小人哉。又如尹士既聞孟子之言。則曰。士誠小人也。此等則是學不至道。而同於私見。不能終從其大體。故謂之小人。易曰。小人。不耻不仁。不畏不義。見利不勸。不威不懲。此則氣質乖戾。姦險凶惡之小人也。治世盛時。若不格而從化。則刑戮之所不貸。此兩者。善惡雅俗。汙潔之辨。如雲泥矣。元錫平時喜事好。

修何至爲由後之小人哉。若由前之小人則恐非元錫之所
能及。今流俗不學之人。而其質不至於不耻不仁不畏不義。
又不得陶冶於先聖王之教。方憑其私意。自以爲善。此則是
俗人。不得謂之士。不得謂之儒。此輩必不能如尹士自知之
明也。然俗人中氣質又有厚薄輕重大小。平時所惜於元錫
者。爲其氣質偶不得其厚重者。故不能自拔於市井之習。又
輕憑之以妄議人之長短。所見日陋。如來書所謂譬即陋見
也。知己之說亦陋。然吾能化陋以爲廣大。請借元錫知己之
說而言之。元錫誠欲求知己。當今之世。捨我其誰哉。但恐元
錫怕逢知己耳。元錫誠能不安其舊。惟新是圖。則本心可以
立復。舊習可以立熄。居仁由義。大人之事備矣。誰得而禦之。
先生語錄又有一條云。初教董元錫自立。收拾精神。不得閑

說話漸漸好。後被教授講解論語。却反壞了。蓋元錫未忘俗見。人好議論人長短。故教以不得說閒話。則漸好。而教以講論。則反壞也。

倪九成

倪九成名貫未詳。惟先生集中有答九成書。勉勵甚至。又責其精神意向無復向時從遊之意。則從學非一日矣。今附錄答九成書於後。

春間承訪。恨不及款。其時見九成精神意向。皆已汨沒。追念向時從遊之意。無復髣髴矣。遠猷愚衷。或冀自此幡然。爲益不細。來書乃有但說病狀。未說病源之疑。此乃俗見。俗習深重。雖聞正言。未肯頓舍。自以曲折之意。爲曲折之說。亦其勢然也。譬如小兒讀讀書。多說懶方。未肯便入書院耳。要

知病源。即此是也。以九成之質。自誠能淑。愚俗見俗。惡能埋沒。人靈蒙蔽。正理思之。既明。幡然而改。奮然而興。出陷穽。如決羅網。如去荆棘。而舞蹈乎康莊。翱翔乎青冥。豈不快哉。豈不偉哉。尚誰得而禦之哉。誠能於此。自決。則名方乃在九成肘後。良劑乃在九成囊中。反而求之。沛然甚足。尚何事觀我朶頤云哉。人靈似當作性靈

李叔潤

李叔潤名貫。未詳。止見於先生與徐子宜書云。李叔潤與之言惡俗交戕之處。泣然流涕。感激良深。自此亦可以爲學。第恨相處不久耳。子宜書中。又及端卿端木等。皆問學於先生者。亦無可考。

薛公辨

薛公辨名貴未詳文集目錄作蔡公辨未知孰是集中有先生與公辨書云所錄諸書已逐一點對末後復趙然道書甚多脫誤可子細將錄本添改庶可讀也書字畫甚無法度如傳字須向上着一點不着點便成傳字古刻傳字專中不着么字但以不着點與傳字爲別所錄書其前尚稍可看向後數篇甚刺人眼結字既不端正畫之長短皆顛倒失宜向來蓋嘗說及此等處何爲都不省記來書辭語病痛極多讀之甚不滿人意用助字不當律令尤爲缺典老夫平時最檢點後生言辭書尺文字要令入規矩如吾兒持之甚懶讀書絕不曾作文然觀其不得已書尺與爲場屋之文其助字未嘗有病造語亦勁健不至冗長此亦是稍聞老夫平日語故能然且今觀吾子之文乃如未嘗登吾門者即此便可自省安

詳沉靜心神自應日靈輕浮馳騁則自難省覺心靈則
有長進不自省覺即所謂動皆乖謬適足以貽羞取誚而
按書中之言則公辨爲先生抄錄所爲文字蓋弟子之親
切者而字畫之未善必細爲指示亦大程子作字甚敬之
意而推原於心靈有無省覺固非僅欲字好也

吳文學恂

吳恂金谿人宋潛溪濂作東吳先生吳公墓誌銘云吳氏初
自延陵而分五季末有諱嗣者自廣信遷撫之金谿其諸孫
宋含光尉邦基生恂從象山陸文安公傳道德性命之學云
云則恂之所造甚高惜其行業無可考也其六世孫東吳先
生儀有大名見第十九卷

李將使雲

李雲興國人將家子也有勇力先生奇而教之後獲用太尉
畢再遇帳下其家祠事先生或問何爲曰雲少時常欲率五
百人打劫起事一日往見先生蒙誨翻然而改不然此身不
得爲人矣見先生四十六歲年譜